

Fundaturs, presidents e secretaris generals da la Lia Rumantscha

■ La Lia Rumantscha è vegnida fundada il 1919 sco organisaziun da tettg da las uniuns linguisticas e culturalas rumantschas en Svizra. Questa presentaziun cumpiglia las biografias da l'emprima suprastanza sco er dals presidents (incl. president da la sesida da fundaziun) e secretaris generals da la Lia Rumantscha, uschè lunsch sco che quellas èn cuntegnidas en il LIR (successiun: tenor data da naschient-scha). Ils 27 da fanadur 1919 ha Giachen Conrad, l'iniziant da la Lia Rumantscha, preschentà a Tusaun en rom d'ina sesida d'orientaziun sias ideas per in'organisaziun tettgala comunabla da tut la Rumantschia. Ils 26 d'october 1919 ha alura gî lieu a Cuira en l'hotel Steinbock la sesida da fundaziun da la Lia Rumantscha. Da questa reunion han prendi part 24 delegads da la Societad Retorumantscha e da las organisaziuns regionalas Uniun dals Grischs, Uniun rumantscha da Schons, Romania ed Uniun rumantscha da Cuira. Sco president da la pli veglia organisaziun rumantscha, la Societad Retorumantscha (1885), ha Andrea Vital presidià la sesida da fundaziun.

Da l'emprima suprastanza da la Lia Rumantscha han fatg part: Giachen Conrad (president), Gian Rudolf Mohr, Giusep Demont, Chasper Pult e Georg Willi.

Andrea Vital

* 11 da settember 1855 a Puntraschigna, † 13 d'october 1943 a Ftan, refurmà, da Sent e Ftan. Figl da Nicola, reverenda, e da Barbara nata Condradin. ∞ Catharina nata a Porta, figlia da Stephan, cafetier a Copenhagen. Scola communalia ed Institut a Porta a Ftan, Scola chantunala a Cuira. Studi da giurisprudenza a Strassburg, Lipsia, Minca e Turitg. Advocat a Ftan a partir del 1878. President da la dretgira cirquitala e districtuala, commember liberal dal Cussegl grond 1879–95 e 1917–23 (president 1892), cusselglier guvernativ 1894–1902 (Departament d'educaziun, president 1896 e 1901), cusselglier naziunal 1899–1919. Vital era participà a moda decisiva a la revisiun da la Constituziun chantunala dal 1894 ed als projects da lescha davart il dretg da las ausas dal 1906 (plau channal) respectivamain dal 1916 (plau federal). Sco emprim suprastant dal Departament d'educaziun en la nova Regenza grischuna da tschint commembars ha el promovì decisivamain la creaziun da meds d'instrucziun per las scolas rumantschas sin tut ils sgualims. President da la SRR 1897–1925. Recaltgader da subvenziuns per il Dicziunari Rumantsch Grischun e confundatur da la LR (1919). Biograf da Gian Fadri Cadernas e da Zaccaria Pallioppi, editur da chanzuns ed autur da «La literatura ladi-na dels ultims tschient ans» (1916).

Jürg Simonett

Presidents	
1919 – 1945	Giachen Conrad
1946 – 1963	Steafan Loringett
1963 – 1964	Andrea Bezzola
1964 – 1977	Pierin Ratti
1977 – 1984	Romedi Arquint
1984 – 1991	Toni Cantieni
1992 – 1996	Chasper Pult
1997 – 2003	Jost Falett
2004 – 2012	Vincent Augustin
2013 – 2015	Duri Bezzola
2016 –	Johannes Flury
Secretaris generals	
1919 – 1932	Steafan Loringett
1932 – 1938	Andrea Schorta
1949 – 1954	Jon Pult
1960 – 1968	Giachen Giusep Casaulta
1968 – 1978	Hendri Spescha
1978 – 1980	Iso Camarin
1980 – 1980	Hans Caprez
	(elegi, sa retratg avant il cumenzament da l'uffizi)
1980 – 1997	Bernard Cathomas
1997 – 2007	Gion Antoni Derungs
2007 – 2017	Urs Cadruvi
2017 –	Martin Gabriel

Presidents e secretaris da la Lia Rumantscha.

Chasper Pult

* 2 da schaner 1869 a Sent, † 31 d'october 1939 a Sent, refurmà, da Sent. Figl da Jon e da Barbara nata Crastan, da Sent. ∞ 1908 Lola nata Küng. Scola primara a Massa Carrara (Toscana) ed a Sent, Scola chantunala a Cuira. Studi da chemia, alura da romanistica a Turitg e Losanna, dr. fil. 1897. Sia dissertaziun, publitgada sut il titel «Le parler de Sent (Basse-Engadine)», è l'emprima monografia impurtanta davart in dialect local dal Grischun. Magister da talian a la Scola auta da commerzi a Son Gagl 1901–34. Commember da la cumissiun filologica dal «Dicziunari Rumantsch Grischun» a partir dal 1907, schefredactur da quel a partir dal 1914 e sco tal – en l'emprima fasa fin il 1920 – rimnader da material linguistic (questiunaris e literatura); il 1939 è cumpari l'emprim fascichel. Sco filolog, lexicograf e cumbattant per la lingua rumantscha è Pult s'engaschà energicamain cunter l'irredentism talian a favur da l'autonomia e la renconuschienscha dal rumantsch sco quarta lingua naziunala. Autur da poesias d'ocasiun e dal raquint «Papparin» (edizioni postuma 1954).

Clà Riatsh

Giachen Conrad

* 15 da november 1882 ad Andeer, † 21 da schaner 1956 a Turitg, refurmà, dad Andeer. Figl da Christian, pur, e da Venera nata Cadosi, dad Andeer. Scola chantunala a Cuira (partiziun da commerzi). Emploia da posta, adjunct da la direzioni da la posta 1939–47. Acquist d'enconuschienscas dal rumantsch. Commember da l'Uniu Rumantscha da Schons. Promotor engaschà da la lingua e cultura rumantscha. Il 1919 ha Conrad rendi attent en in artigel publitgà en la «Neue Bündner Zeitung» sut il titel «Kassandrastrimmen vom Hinterrhein» als privels imminents da la germanisaziun ed ha pretendi dals Rumantschs cuntramesiras energicas e radicalas ed in agir metodic e planisà. Ses apper fervent ha efectuà ils 26 d'october 1919 la fundaziun da la Lia Rumantscha, da la quala Conrad è stà l'emprim president 1919–45. Undrà cun il Curtin d'onur da la Lia Grisch a Trun.

Adolf Collenberg

Georg Willi

* 9 d'october 1884 a Surrein/Sumvitg, † 15 da november 1946 a Blinzuna, catolic, da Domat. Figl da Christoph Bartholome, scolast privat tar la famiglia Thurn und Taxis a Prag, pli tard president communal da Domat, e dad Elise nata Schmid von Grüneck, educatura a Paris e Londra. Nev da l'uvest Georgius Schmid von Grüneck. ∞ Julia Condrau, figlia d'Augustin, medi. Gimnasi a Feldkirch, collegi a Sviz, studis da giurisprudenza e filologia a Friburg, dr. iur. 1909 («Schweizerisches Viehwährschaftsrecht», 1911). Alura dus onns magister privat a Firenza ed Arezzo. Pratica d'avocat a Cuira a partir dal 1911. Deputà conservativ-catolic en il Cussegl grond 1911–19 (per il cumin d'Il Plaun), cusselglier guvernativ (Departament da giustitia, polizia e sanitad) 1920–26, cusselglier dals chantuns 1935–38. A basa da sias experientscas negativas sco chapitani d'infantaria durant l'Emprima Guerra mondiala, ha Willi inoltrà il 1936 in postulat per introducir ina cumpensaziun da la paja e dal gudogn per schuldads, realisada tschint mais suenter l'entschatta da la Segunda Guerra mondiala e cumpertada pli tard cun subsidis per purs da muntonga e lavurers occupads en l'agricultura. Directur da l'Uffizi federal per industria, mastergn e lavur (oz Secretariat da stadi per l'economia) dal 1939 fin sia mort.


Roman Bühler

Gian Mohr

* 18 d'avrigl 1885 (Gion Rudolf) a Zernez, † 12 da favrer 1956 a Cuira, refur-



Giachen Conrad (emprim president) e Steafan Loringett (emprim secretari general da la Lia Rumantscha).



mà, da Susch e Tschlin. Figl da Mathias, pur, e da Mengia nata Notegen, da Tschlin. ∞ Otilia nata Töndury, figlia dad Otto, advocat a Scuol. Gimnasi a Cuira, studi da giurisprudenza a Friburg, Minca e Berna, dr. iur 1911. Advocat a San Murezzan e redactur da la «Engadiner Post» 1913–19 e dal «Freier Rätier» a Cuira 1919–35 (schefredactur a partir dal 1920). Vicepresident da la Lia Rumantscha 1920–45. Commember liberal dal cusselg grond da la citad da Cuira (legislativa) 1922–31, president municipal 1935–51 ed a medem temp commember dal Cussegl grond (president 1944). Cusseglier naziunal 1947–50. El è sa retratg da tut sias funcziuns per motius da sanadon. Sco president da la citad da Cuira ha Mohr promovi l'amplificaziun da l'infrastructura da la citad fermamain creschenta en il suenterguerra.

Jürg Simonett

Steafan Loringett

* prim da mars 1891 a Scuol, † 6 da zerciadur 1970 a Cuira, refurmà, da Vargis-tagn. Figl da Risch, pur, e da Johanna nata Moser, da Wildhaus/SG. ∞ 1) Deta nata Tschurr († 1948), 2) Maria nata Calonder. Scolas a Maton, Scuol e Ziràn, alura Seminar scolastic a Cuira. Scolast a Scuol, Maton ed Andeer a partir dal 1912, secretari da la Lia Rumantscha 1919–32 (fundada il 1919) e da l'IDRG (fin il 1926). Agent general da la societad d'assicuranzas Winterthur 1926–56, president da la Renania 1929–44. Sco president da la LR 1946–63 ha Loringett stabili ed intensivà ils contacts cun ils Ladins da las Dolomitas. Cuminiant da la Cuminanza Culturala Val Schons (1958). Poet e translatur; president da la cumissiun chantunala per meds d'instrucziun ed autur principal da la fibla rumantscha dal 1921 (illustrada da Giovanni Giacometti). Dr. h.c. da l'Universitat da Turitg 1962, undrà en il Curtin d'onur da la Lia Grisch a Trun.

Adolf Collenberg

Pierin Ratti

* 8 d'avrigl 1904 a Madulain, † 8 d'avug 1984 a Cuira, refurmà, da Madulain. Figl da Piero, pur e postin, e d'Annetta nata Steckli, da Schlarigna. ∞ Erica nata Kuhn, da Segl e Lindau/ZH. Gimnasi a Cuira, studi da giurisprudenza a Turitg e Geneva, dr. iur. 1936. Actuar dal circul d'Engiadina/Ota, derschader dal district da Malögia, cusselglier communal a Samedan, commember dal Cussegl grond a partir dal 1949. Commember da la Partida democratica. Cusseglier guvernativ 1956–62 (president 1959 e 1962). Sco chef dal Departament d'educaziun e da sanitad è Bezzola s'engaschà fermamain per la nova lescha da scola (1961). Ultra da quai è el era stà activ en la Fundaziun Planta ed en la

Pro Lej da Segl. President da la Lia Rumantscha 1963.

Paul Eugen Grimm

Giachen Giusep Casaulta

* 19 d'october 1919 a Lumbrein, † 17 d'avug 1995 a Cuira, catolic, da Lumbrein. Figl da Gion Bistgaun, pur, e da Johanna nata Lombris, da Vella. ∞ Domenica nata Sonder, da Salouf. Gimnasi ad Ebikon/LU e Mustér. Studi da giurisprudenza a Friburg, dr. iur. 1946. Advocat a Cuira dapi il 1947. Secretari dal Departament da construziun e selvicultura 1948–60, secretari da la LR 1960–68. Commember catolic-conservativ dal Cussegl grond per il circul da Cuira 1961–68. Cusseglier guvernativ 1969–78 (Departament da giustia e polizia fin l'avril 1969, alura dal Departament da construziun e selvicultura, president 1972, 1977). President da la Conferenza dals directurs chantunals forestals e president da la fundaziun da la Scola forestala interchantunala, inaugurada il 1975 a Maiavilla. Commember d'onur da la Societad forestala grischuna e president da l'Associazion dal Rain 1979–92. Casaulta è s'engaschà fermamain per la construziun da vias e per la protezioni cunter lavinas e torrents. Autur d'intigilas novellas e poesias. Adolf Collenberg

Toni Cantieni

* 14 da matg 1928 a Vaz, catolic, da Vaz. Figl da Christian, pur, e dad Anna Margaritha nata Parpan. ∞ Anny nata Pally, mussadra, figlia dad Augustin, magister, da Tujetsch. Seminari scolastic a Cuira 1945–49, patenta da scolast secundar a l'Universitat da Friburg 1953. Scolast a Vaz, Cuira e Casti 1949–62. President communal da Vaz 1962–76. Commember dal Cussegl grond 1963–73, cusselglier naziunal 1971–87, commember dal Cussegl d'Europa 1982–88. President da la Partida cristiandemocratica grischuna 1968–75. President central da l'Associazion svizra da vischancas 1987–95. President da la Lia Rumantscha 1984–91 e da la Pro Svizra Rumantscha 1992–2001. Mainafatschenta e delegà dal cusselg administrativ da las Pendicularas Danis SA a Lai 1977–93. Ursus Brunold

Hendri Spescha

* 24 da november 1928 a Trun, † 28 d'october 1982 tranter Turitg e Domat (en viadi da return cun la viafier), catolic, da Trun. Figl da Josef, chalger e lavurer da fabrica, e da Catrina nata Nay. Frar da Matias. Nev da Sep Modest Nay. ∞ Martina nata Jörger, da Domat. Seminari scolastic a Cuira 1944–49. Scolast primar a Tinizong 1949–50. Studis da psicologia, pedagogia, litteratura, istoria, istoria da la musica ed istoria d'art a l'Universitat da Friburg. 1950–59, patenta da scolast secundar. Alura scolast secundar a Domat, directur dal Center grischun d'integrazioni per personas cun impediments a Cuira 1959–68, secretari da la LR 1968–78, redactur da la Televisiun rumantscha 1979–82. Commember dal Cussegl grond per il circul da Razén 1973–79. Spescha vala sco in dals pli importants innovaturs da la lirica rumantscha («Il Giavin dalla siringia/Das Locken des Flieders», 1984; «Uss: poesias/Jetzt: Gedichte», 1998). Autur engaschà da sieus auditivs e raquints. Premi Schiller 1964. Ursina Guldemond-Netzer

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istoria grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampata: www.casanova.ch u en mintga libriaria.